

靜
志
居
詩
話

靜志居詩話卷九

秀水朱竹垞先生著

扶荔山房編輯

沈周字啓南長洲人景泰中郡守以賢良應詔辭
不赴有石田先生集

石田詩不專仿一家中晚唐南宋靡所不學每於平
衍中露新警語人既貞不絕俗詩亦變而成方惟七言
律詩差少全壁句如明河有影微雲外清露無聲萬木
中落木門牆秋水宅亂山城郭夕陽船竹枝雨暗蠨蛸
戶豆葉風涼絡緯籬翦取竹竿漁具足撥開荷葉酒船

通牆凹爲避鄰居竹圃熟多分路客瓜酒醉又移花下
席書多別起竹間樓青山一杖付歸客玉洞千花畱故
人竹裏行廚青玉案酒邊官妓茜紅裙片帆南浦草仍
雨斗酒長亭花又風歲晏雞豚鄰社鼓秋深鰕蟹水鄉
船芭蕉夜雪闌新興蚊蜨春風卷畫圖明月未來風滿
樹夕陽猶在鳥無聲蘼蕪細雨山連郭翡翠斜陽水滿
川野色迎人過橋去春風吹面傍花行所謂詩中有畫
者非邪昔郭熙撰林泉高致具撫唐人之句取可入畫
者授人若翁之詩卽此亦圖之不盡也

史鑑字明古吳江人有西村集

西村才名亞於石田然以詩論刻意學古似當勝沈一
籌其述曾祖仲彬行狀止云推擇爲稅長先民質實不
誣其祖若是其後致身錄出始云授翰林院侍書浸假
而直文淵閣矣浸假而擢翰林院侍讀學士矣浸假而
稱沒後建文帝有御製文易名曰忠獻矣常熟錢氏吳
江潘氏先後辨其妄近有司祀于瞽宗此當考實者也

趙同魯字與哲長洲布衣有仙華集

成宏間布衣家居得言天下事如沈啓南讀楊宮詹守

吐與屠尙書瀟論事劄子作爲長篇而曰江湖眇吾憂
其言不可終屠答詩云願言保遐壽待吾談始終未嘗
以處士橫議藏怒蓄怨焉與哲三上王三原書極言吳
中財賦之重三原賞其文欲薦於朝事雖不果而兩公
之虛懷可敬也自宋景定四年春三月買公田於浙西
六郡共田三百五十餘萬頃所收者公租耳迨元有天
下置江淮財賦都總管府又立江浙財賦府各領官田
籍沒田皆不在州縣原額元史所紀大臣賜田咸在平
江等路於時官田已多及張士誠據吳所署平章太尉

等官皆負販小人無不志在田宅一時買獻之田遍於浙西明初既入版圖按其租籍沒人之已而富民沈萬三等又以事被籍沒而浙西之官田愈多矣官田之租多者每畝輸倉米一石五斗少者七斗七升四合本依租以徵稅此租額而非糧額也相沿既久混租爲糧於是官民之田科則相遠官田多者不勝其苦而蘇松嘉湖四府尤甚其後蘇州之田賦則巡撫都御史陳均之湖州之田賦則知府劉天和張鐸均之嘉興之田賦則知府趙瀛均之稽諸實錄孝陵獻陵景陵咸下減租

之詔彼時尚分官民等則故然迨平賦之後官田之重賦得輕在當日民非不以爲利然民田之輕賦反重在今日欲額恩求減則其籍已去無從依據此司國計者所當留意也至於嘉興原止三縣宣德中析嘉興添設秀水嘉善析海鹽添設平湖析崇德添設桐鄉嘉興民田多故田則輕嘉善官田多故田則重秀水則官民相等故在輕重之間趙氏圖記可證善邑不原其本爭訟者幾百年不知非附郭二縣之弊猶賈似道之貽害爾附錄王濟之云處士身居田里而喜論當世事見人

之屈抑與民間利害時政闕失憤然若迫於身年饑
三上書巡撫三原王公得減稅銀近歲論東南水患
起於嘗熟之白茆港開白茆則水患衰堤崑山之沙
湖則盜賊息而處士已言於數十年之前矣 方時
舉云先生宋宗室世豕浦江仙華山下故以名其集
不忘本也集中作音響和平意度閒遠無山林之枯
瘠無藜藿之窮愁而閱時憂國之意恒寓焉及屢上
當道書切切以東南賦重役繁爲念視民如飢溺若
迫於其體膚有不能自存者方之古人殆魯仲連之

徒與

姚丞字存道號時庭長洲人宏治中貢生有集虛齋橐

存道爲文毅公希孟高祖吳尚書一鵬婦翁也友于楊君謙王濟之與沈啓南酬和尤數吟詠之暇不廢詠諧鄉人周宗道者修髯而皋橋趙鳴玉無鬢存道請於周分十鬢予趙啓南爲草募疏云伏以念天闈之有刺憫地角之不毛雖傅相莫逃於禿名賴易賁尙存乎飾義爲人者康樂捨施有迹爲己者鶴謚插種有方故小子

十莖之敢分豈先生一毛之不拔推其餘以補也宗道
廣及物之心乞諸鄰而與之存道獲成入之美使離離
緣坡而詫我當楫楫擊地以拜君把鏡生歡頓覺風標
之異臨流照影便堪相貌之全未容輕拂於流美豈敢
易撚於覓句感矣荷矣珍之重之一時傳以爲笑斯亦
風人善諱之遺也存道詩未發雕流傳遂寡孝廉田修
出家藏本錄其近體二首

崔澂字淵甫吳江人國子監生有傳響集

淵甫年未三十而夭當其存日楊君謙吳原博李貞伯

都元敬沈啓南周伯器史明古諸君子皆與訂忘年之交原博尤重之呼爲崔小先生云集中和唐詩多至三百七十餘首恪守唐人矩矱而未成變化使假之年當不止是此諸君重爲悼惜也

史忠字端本一字廷直上元人

廷直自號癡翁近冶城建樓題曰卧癡楊君謙爲作記翁畫山水人物花木竹石皆工嘗訪沈啓南於吳門不值見堂中幃有素絹搖筆作山水不題姓名而去啓南歸見之曰吳中無此人必金陵史癡也邀之回留二月

乃返翁妻樂清道人朱妾白雲道人何玉仙玉仙亦善
畫工篆書知音律翁教以琵琶每自製曲命玉仙被之
絃索晚無嗣一女既笄婿貧不能娶與婿期元夜略具
隻雞斗酒我嘗過飲至元夜誑其妻女曰家家走橋觀
燈盞亦隨俗可乎攜妻與女送至婿家畱其女一笑而
別卽是而觀翁正未嘗癡也二隱囊流傳絕少題畫一
絕云雲光辣闌樹模糊略約色籬路有無曾記南徐江
上雨會心只有米於菟乃仿小米雲山書法頗豪縱曾
觀於休寧吳璵于庭宅

黃雲字應龍崑山人由歲貢生任瑞州府學訓導

有丹巖集

丹巖懷才不遇嘗渡清淮盡以文橐投諸水晚就一瓊
苜蓿之盤不飽賦闕食詩云妻子恒苦飢生事轉疎拙
矧茲秋收時吾室甌儲闕名微賤賣文所得亦易竭又
絕糧詩云今朝斷晨炊家人盡僵卧天陰動寒氣鳴屋
霰交墮入市糴脫粟薄糜聊拯餓可謂窮矣詩雖未純
然勝林屋十倍

莫止字如山無錫人有南沙集

附錄周青士云南沙亦有佳句如云天濶一聲何處
雁江平千里獨歸舟新添十竹皆紫玉恰對九峰如
畫屏松塢風高聞落子菊籬秋晚愛餘花皆儵然拔
俗也

錢百川字東之無錫人有寒齋狂槩

東之絕句小詩頗類崔國輔晚師陳莊遂爲學究體其
觀石田集詩云宋周程張朱道大言莫比迄今五百年
惟陳白沙氏未免頽然自放矣句如持竿坐惜籬邊水
仰面貪看屋上山淺碧杯中歌落日亂紅堆裏宿殘霞

想猶少年作也

附錄俞汝成云東之少年學琵琶半日度四十曲人以爲神解詞賦多不傳晚宗陳白沙氏

張承安陽人山東教官

張君爲崔後渠門人客至一詩云茅屋兩三間草草蔽風雨客來不入門坐愛千年樹意甚蕭遠

方太古字元素蘭谿人有寒溪子集

布衣初受經於楓山中年棄去專力於詩不苟隨時尙句如老松萬樹霽深雪流水一溪浮落花白布探囊無

長物烏皮凭几笑翁居平田白漁流新雨絕壁青楓挂
斷雲朝看煙雲如畫裏夜聞風雨似潮生多情夜雨馬
蘭草無限春風鶯粟花雲洞草香初過雨月臺松老不
知年願近江西詩派蓋特立之士也

程元輔字叔朋歙人有龍谷老人集

附錄愚山云叔朋自邑之季父先自邑稱詩十年自
邑因李獻吉名而叔朋人無知者至萬歷間潘景升
始序而傳之

朱曜字叔暘松江華亭人以鄉貢仕爲鹽課提舉

後以子豹貴封御史有玉洲集

附錄錢武子云封君詩取自娛不事敦琢然如翠竹
呼鳩婦青畝長稻孫不可謂非佳句也

秦奭字仲孚無錫人夔之弟有滌煩亭橐

仲孚爲修敬封公季子封公暴中心痛仲孚刺血於胸
和酒飲之母殷恭人膝傷吮之而愈郡縣上其事詔旌
其門曰孝子秦陵卽昨賜以冠帶嘗作溪出清興堂清
遠閣結亭於後圃顏曰滌煩九日詩云抱病忽聞佳節
至獨攜藜杖強登臨黃花笑我容還瘦綠酒盈樽手自

斟處處辭巢知社燕家家悲杵送秋音不堪寶鏡頭如
雪折得好枝嬾去簪次日得疾不起其詩較父兄別裁
體格頗有清疎之氣

附錄趙元默云昔人評詩謂有詩中畫有畫中詩集
中如杖藜扶我溪橋步看盡湖南十里山則詩中畫
也微風輕颺茶烟起知有人家在水西則畫中詩也

董澐字復宗海鹽人有從吾道人詩橐

蘿石聞陽明講學瓢笠渡江從之時年六十有八年長
於陽明云明年從其師越中守歲風雪夜賦詩所云六

十九年今夜除者是也陽明和韻云况有故人千里至
不知今夜一年除復爲序其事云道人今年已七十往
來湖山之間去住蕭然曾不知有家室其子毅賢而孝
謂道人老矣出軌長跪請留道人笑曰爾之愛我也以
姑息吾方友天下善士以與古聖賢爲徒天地且逆旅
奚必一畝之宮而後爲吾舍邪集有山居吟云青山遶
湖茅結廬飢餐渴飲事無餘是非欲付樵與漁洵達者
之言也

魏偁字達卿鄞縣人官石城訓導有雲松詩略

附錄李杲堂云雲松詩略歐陽鵬所選於三千餘首
中止錄三百四首所遺必多佳者

錢福字與謙松江華亭人宏治庚戌賜進士第一

官翰林修撰有鶴灘集

鶴灘吟情以捷敏勝故自解春雨後凡俚詞儷句動輒
歸之此選家皆棄不錄也喬希大志其墓曰與謙卒年
纔四十有四予與與謙同游遂菴西涯二先生之門與
謙嘗言作文須昌其氣先使一篇機軸定於胸中然後
下筆當沛然莫禦矣又言辭必根據道理雖恒言近事

亦不可略然則鶴灘亦不專以捷敏勝人所傳俚詞儼句亦未必皆出其手也

靳貴字充道丹塗人宏治庚戌賜進士第三累官太子太保戶部尚書兼武英殿大學士贈太傅諡文僖有戒菴集

文僖康陵舊學南巡時臨其喪命詞臣撰文皆不稱旨御製一首云朕居東宮先生爲傅朕登大寶先生爲輔朕今南游先生已矣嗚呼哀哉代言者歎息歛手晉江何氏輯明文徵以此壓卷焉

祝允明字希哲長洲人宏治壬子舉人除興寧知
縣遷應天府通判有祝氏集略又有金縷醉紅
窺簾暢哉擲果拂絃王期等集

六如居士畫枝指生書允稱絕品至於詩遜昌穀三十
籌然如莫食汨羅魚腸中有靈均小山侵竹尾細水護
松根麥響家家碓茶提處處筐人家低似岸湖水遠於
天置之歎歎集中正自難辨

顧清字士廉松江華亭人宏治癸丑進士改庶吉
士授編修進侍讀忤劉瑾調南京車駕員外郎

瑾誅還侍讀進少詹事引歸爲南禮部侍郎進

本部尙書致仕卒諡文僖有東江集

東江詩法西涯觀其險韻再四疊用足見其能事當日諸公受長沙衣鉢或推方石或稱二泉或首熊峰以鄙見衡之要皆不敵也

吳一鵬字南夫長洲人宏治癸丑進士累官太子

少保南京吏部尙書卒贈太子太保諡文端有

集

尙書名位與原博濟之鼎峙中吳詩雖不敵原博品在

濟之伯仲之間原博闕一鶴園於都下中有玉延亭海
月菴及以憂去推尚書居焉趙粟夫過之謂其亭曰借
玉謂其菴曰借月尚書詩所云乾坤浩蕩誰非主邱壑
風流我所私也詩集十卷選家罕有錄之者

曹鏞字良金吳江人宏治癸丑進士改庶吉士授
刑部主事進員外郎調東昌府通判遷興化府
同知擢湖廣按察司僉事有林歸集

良金仕未通顯而能力攻中貴人直節不易及歸田之
後娛情繪事興到題詩於所居宅後積土爲山植桐其

上名曰桐邱句如一片酒旗春雨店數聲漁鼓夕陽村
鵝翎白綴霜前菊鱸血紅生雨後柑剪紙爲屏遮破壁
牽蘿補屋透斜暎軒牕影暗梧桐密籬落香飄枳殼開
漁鼓喚人敲轉急酒旗招客挂偏高頗類白石翁

許天錫字啓衷閩縣人宏治癸丑進士改庶吉士
授吏科給事中歷工科都給事申上疏劾劉瑾
爲瑾所殺嘉靖中追賜祭葬有黃門橐

黃門奉使安南却其贖賦詩云菁茅又喜重包貢蕙苴
何須滿載歸比歸劉瑾疑其金多不知其不受餽也黃

門之死瑾矯詔逮問潛遣人殺之而撰府志者或謂其
自經或謂是夜尙草疏皆謬當以世宗實錄爲正鄭少
谷詩云風流不見許黃門遺字丹青閣上存却畱詩句
車盤驛黃犢青山何處村蓋黃門過車盤驛曾題詩壁
間有青山對面疑無路黃犢出林知有村之句爲時所
稱謝在杭亦有詩紀其事

杭淮字東卿宜興人濟弟宏治己未進士累官南
京總督糧儲右副都御史有雙溪集

雙溪詩極其遒鍊如繭絲抽自梭腸似澀而有條理五

言尤擅場可亞少谷

附錄俞汝成云孝廟以還李何二公首倡詩學一時揚袂而起者如徐迪功能士選康對山王浚川輩不啻數十家宜興杭澤西雙溪昆季亦同聲而應者也

王良佐字良弼松江華亭人宏治乙卯舉鄉試選

靖海教諭遷知廣濟縣有鶴坡集

鶴坡與戚韶龍困張冕一桂同居松江之珠涇咸有詩名孫文定刊三詩翁集行之王作較勝其與儲黃論詩云幾許門牆黃太史三分局面鄭都官其實派出石田

頗饒清曠之致

劉麟字元瑞本安仁人先世以武功襲南京廣洋
衛副千戶遂家焉中宏治丙辰進士除刑部主
事歷員外郎中出知紹興府削籍徙居湖州起
知西安府擢雲南按察使謝病歸尋起太僕寺
卿遷副都御史巡撫直隸復引疾再起大理寺
卿改刑部右侍郎陞工部尙書卒諡清惠有南
坦老人集

尙書由二千石登三九之列數棄官以去好爲山水之

游流寓長興之南坦自號坦上翁與孫山人一元龍僉
事霓及茗中名士吳琬施侃等結詩酒社號茗溪五隱
年八十餘被褐坐小舟赴岷山會人不知爲鉅公也嘗
請浚川預作墓銘可云達天知命者矣顧華玉贈詩云
琴鶴居何定蓴鱸味獨偏王履吉寄詩云鸞鶴諧真賞
瑤華贈遠人孫太初詩云閉門句好香殘後擣藥聲高
月上初其風流可想見也

陶諧字世和會稽人宏治丙辰進士累官兵部左
侍郎贈尚書諡莊敏有南川漫游橐

南川詩未知津數與空同酬唱吾服其膽

劉玉字成栗萬安人宏治丙辰進士除知輝縣人
爲御史歷南京左僉都御史董江防後至刑部
左侍郎有執齋集

康陵南巡將臨斯文僖喪詞臣撰祭文均不稱旨御製
文云朕居東宮先生爲傅朕登大寶先生爲輔朕今南
游先生已矣嗚呼哀哉當時代言之臣咸斂手歎息嘉
靖中王新建沒執齋侍郎作祭文云嗚呼公之才拔乎
其萃嗚呼公之學出乎其類嗚呼公之功疇克似之嗚

呼公之壽竟止於斯亦可謂言簡而意盡矣執齋當宸
濠之變正理江防馳檄師中與喬莊簡犄角克固疆圉
其功有足錄者詩頗娟秀絕塵比於莊簡似過之送行
云日日都門送別離道傍楊柳已無枝西飛白日東流
水不放行人住少時百舌云百舌鳥何佻巧啼遍上林
音裊裊雌鳩喚雨雄鳩睛鷓鴣欲住鷓鴣欲行一鳥一舌
尚難定爾有百舌能無爭人生言出慮禍人一言之失
駟不及三寸舌在中禍機喑爾百舌無是非志怪云紀
歲丁丙戌夏四月廿六靖浪之民家黃符身孕犢一項

而二首各具口耳目五月十四日丙申金壇農婦生怪
人頭方四角面青而六眼高額凹鼻獠牙鳥喙如山精
手足一節具一爪墮地鬼叫連三聲歛然起走擊乃斃
創見此怪吁可驚七月望仍丙申日異牛又產南陽邑
二首相同項亦分心肺雖分身尾一聞之嗟嗟稽占書
無乃世降生形殊反身修德天可格祥桑枯死安無虞
黃衷字子和南海人宏治丙辰進士歷官兵部右

侍郎有矩洲集

矩洲詩無根核與到筆酣間與曩篇暗合若野練晴飛

孤嶼白木棉春試小枝紅白酒河橋花底社黃螺沙市
蠶家兒處處短垣圍牡蠣家家生計種扶畱鳥際忽開
衡岳寺林端恰下灌江船桐木歸來津口渡楊花飛過
驛南樓狀南中風景歷歷在目

陳霽字子宇吳縣人宏治丙辰進士改庶吉士授
編修忤劉瑾勒致仕瑾誅復館職歷國子監祭
酒有玉堂成均歸田諸藁燬於火僅存葦川集
藏於家

祭酒古之遺直爲史官時而責劉瑾謂古者刑不上大

夫大廷非行杖之所且言劉公健謝公遷皆顧命大臣
君無故一旦去之恐非所以保貴富之道瑾對以廷杖
正統年有之公曰此姦邪王振所爲爾瑾爭曰王振死
土木之難忠臣非姦邪公作色曰此賊幾覆社稷何忠
之有瑾曰編修借振罵我邪銜之欲置公死地以丁母
憂僅免其後又劾江彬幾爲彬所陷歸田澹退尤人所
難詩草被焚從其裔孫錄手稟一首

熊卓字士選豐城人宏治丙辰進士授平湖知縣
徵拜監察御史有熊御史詩選

張光世集爲康德涵所定熊士選詩爲李獻吉所刪兩君俱有才名不應牽率若是疑所汰者金而所存者沙矣

趙鶴字叔鳴江都人宏治丙辰進士歷官山東提學副使有具區集

李獻吉登岱詩日抱扶桑躍天橫碣石來宗子相稱之謂有芥視岱宗斗量滄海之致若叔鳴山壓星辰從下看海浮天地自東迴亦警句也

朱諫字君佐永嘉人宏治丙辰進士歷官贛州知

府調吉安謝病歸有蕩南集

蕩南近體足自名家冬日喜奚蘭室老友見訪云江村
寒月客來稀坐對梅花半掩扉燈火最憐清夜話溪山
偏愛舊人歸酒樽欲盡還堪瀉世路無情已息機相見
不須悲白髮山林鐘鼎總成非章孝夫雁麓山莊云陰
陰竹樹繞山根石徑雲深蕩北村無數落花浮水面盡
隨鷗鷺到柴門鈎簾靜對千峰月種藥新開五畝園長
日南窻事高卧漫將風景說桃源

唐寅字伯虎一字子畏吳縣人宏治戊午舉南京

鄉試第一坐事下獄放歸有六如居士集

六如淪落明時恒賣畫爲活故其詩云領解皇都第一
名猶披歸卧舊茅衡立錐莫笑無餘地萬里江山筆下
生又云青衫白髮老癡頑筆硯生涯苦食艱湖上水田
人不要誰來買我畫中山誦之悽然足以悲矣然於畫
頗自矜貴不苟作而詩則縱筆疾書都不經意以此任
達幾於游戲此袁永之輯其集僅存少年之作實未足
以盡其長余於集外從畫卷錄其隨題絕句八首饒有
風致未至如乞兒唱蓮花落也

附錄袁永之云子畏築室桃花塢中讀書灌園家無
儻石而客常滿座風流文采照映江左謂人生貴適
志何用劇心鏤骨以空言自苦故其著述多不經深
思語殊俚淺 愚山云子畏詩少喜穠麗學初唐長
好劉白多悽怨之調晚益自放不計工拙與寄爛漫
時復斐然蘇臺袁表輯其詩僅存少作而顧華玉以
爲絕藝在是此固未知伯虎抑豈可謂知詩者哉

蔣瑤字粹卿歸安人宏治己未進士田御史出知

荆揚二府累官工部尚書加太子少保卒諡恭

靖

康陵南巡近侍希帝意旨欲刷民間女子恭靖公知揚州府事語江彬等曰揚州女子少多受聘不便奪之無已則知府一女在得旨斯進耳乃罷時山陰江清憲先生知泗州中使傳旨令進美人善歌吹者先生奏言泗州婦人荒陋無可應勅臣向民間訪桑婦儻納之宮中俾受蠶事庶於治化有裨事亦得寢二公疆直頗相類而康陵未嘗震怒亦足見帝德之寬大矣相傳駕旋時恭靖爲彬等繫於舟中三日不食驅令送駕所騎馬受

奪止攜一被墊驢背夜則寢焉抵臨清徒跣行岸上康陵遙望見之曰是蔣知府邪可速遣還方得免維揚人感之入髓春秋尸祝至今恭靖以官保尚書予告林居者二十年入硯山社詩不多作惟秋社一律僅存

孫緒字誠甫故城人宏治己未進士歷官太僕寺卿有沙溪集

沙溪無用閒談足資國史之采擇詩不見佳

王守仁幼名雲生字伯安餘姚人宏治己未進士授刑部主事改兵部坐救戴銑忤劉瑾杖闕下

謫貴州龍場驛丞旋復南京刑部主事改吏部
歷員外郎中遷南太僕少卿轉鴻臚寺卿拜左
僉都御史巡撫南贛陞右副都御史論平宸濠
功擢南兵部尙書封新建伯卒贈侯諡文成從
祀孔子廟庭有陽明先生集

新建勲業氣節文章皆可甲世特多講學一事讒言惟
興彝尊少聞先君子之言矣心齊顏子之學也良知不
動心孟子之學也大學思復戴鄭之舊定論莫息鵝鹿
之爭仁智之見各殊楊墨之歸斯受其後流而爲禪者

門弟子之過也今就先生之詩觀之其過濂溪祠云瞻
依多少高山意曾向圖書識面真讀易詩云乃知先天
翁畫畫有至教題武夷壁云溪流九曲初諳路精舍千
年始及門示程畢二子云紫陽山下多豪俊應有吟風
弄月人則先生何嘗立意樹幟張弧與洛閩諸儒異乎
乃訾訾之口以先生學術未純并先生大節疑焉皦皦
素絲欲染爲緇彼譖人者亦太甚矣

張琦字君玉鄞縣人宏治己未進士除南大理評
事歷寺正陞興化知府歷福建左參政致仕有

白齋竹里館二集

白齋於李何詩教盛行時別出機杼專以宋人爲師句
如人到百年一過客吾當十日九揮毫千村土犬月照
雨半夜江魚潮入田天上星辰離舊次夢中山水作真
游離歌對酒無三疊殘暑先秋退一分十里長亭斷短
樹滿天晴日落黃沙溼螢燄竹火依火疲馬出郊山復
山路入林低潮裏樹山行月黑虎窺人殘年滯雪開新
歲五日敲冰過一州古刹今僧相見少新篁舊竹長來
齊水邊地冷苔生髮山外民貧竹有花入之誠齋安晚

集中猶上駟也弇州方之夜蛙鳴露說者以爲過而白齋出郭詩云一部新詩一部蛙則作者先以自喻矣

都穆字元敬吳縣人宏治己未進士授工部主事歷禮部郎中乞休加太僕少卿致仕有南濠詩

略

祝希哲九朝野紀徐昌穀剪勝野聞往往紀載非實惟都少卿南濠文跋西使記金薤琳琅聽雨紀談事必稽核蓋篤學之士也相傳吳中有娶婦者夜大風雨滅燭徧乞火無應者衆皆曰南濠都少卿家當有讀書燈在

叩其門果得火齋居乏食笑曰天壤間當不令都生餒死先民風節如是詩無足錄存豹一斑

張鳳翔字光世洵陽人宏治己未進士除戶部主事移病歸卒年三十有伎陵集

伎陵集洵無足錄蒙叟誚獻吉黨護作傳然其集本獻吉評點初不假借不以爲近俳卽以爲太實或譏其篇章雖多事重意複或評其蘊蓄有餘變化未至惟卷末數篇云流動工緻所謂吾見其進也是無異師之視弟子若其文有擬彭澤士夫送陶潛解任歸序詆之曰此

篇疑未覩歸去來辭而作則侮人太甚矣愚山黨護之
論殊不其然

謝廷柱字邦用長樂人宏治己未進士除大理評
事歷官湖廣按察僉事有雙湖集

邦用詩如屏塵在握淨埽游塵

周用字行之吳江人宏治壬戌進士除行人授南
給事中陞廣東左參議遷浙江按察副使改山
東歷福建按察使河南右布政使以副都御史
撫南贛召還理院事陞吏部侍郎尋遷南京右

都御史進工部尚書改刑部復召入爲左都御
史秩滿加太子少保轉吏部尚書卒贈太子太
保諡恭肅有白川集

白川十齡能畫長師石田翁得其指授詩則別裁風格
取法杜陵集中詩云畫品仍游藝詩家特擅名丹青乃
餘事金石自希聲散地方盤礴諸公孰老成朝川稱二
絕早晚慰平生蓋以摩詰自喻也余嘗見公畫龍戲浪
穿山蜿蜒升降百年絹素雲霧猶溼至寫平坡放犢亦
不減史道碩厲歸真乃知公藝事兼能不惟以經濟文

章重也

魯鐸字振之景陵人宏治壬戌進士改庶吉士以
編修使安南累官南國子監祭酒卒贈禮部侍
郎諡文恪有蓮北使交東廂諸集

文恪以清德稱恒曰人嘗齷得菜根則百事可作君子
以爲名言歸田日築已有園於宅東賦之曰其蔬則有
芥苜葵莧蘆菹菠菘芥苗嶺表山藥土中春間剪韭秋
高折蔥豆多豉扁瓜備西東瓠較五石爲劣芋譬蹲鴟
狀同蘇子瞻所云我與何曾同一飽不知何苦食雞豚

也又曰安予分之所遇兮求予心之所好苟沒世其有稱兮奚外身而有校又曰人生信亦有涯兮嗟世事之莫盡往者幸於免咎兮來者可諉於余分達生之言猶恐修名之不立庶異乎莊老之指矣

徐問字用中武進人宏治壬戌進士除廣平推官召爲刑部主事轉郎中出知登州府調臨江遷長蘆鹽運使歷廣東左布政以右副都御史巡撫貴州拜兵部侍郎改禮部進戶部尙書謚莊裕有養齋集山堂萃橐

尚書五律清高深穩歌行如山雞野鶴自啼舞赤日照
耀神仙宮懸厓石壁置臺觀凌虛下瞰馮夷宮寒潮漏
日下孤島潮回響聒晨昏鐘頗具謫仙風骨

何瑛字粹夫懷慶衛人宏治壬戌進士改庶吉士

授編修轉修撰謫開州同知稍遷東昌府同知
陞山西提學副使改松江擢南太常寺少卿署

翰林院事歷工部右侍郎改戶部復改禮部陞
南京右都御史贈工部尚書諡文定有柏齋集

文定講學兼明禮儀樂律其撰許魯齋祠堂碑稱魯齋

以躬行爲急而不徒事乎語言文字之間道以致用爲先而不徒極乎性命之奧且言近世之士有志乎聖賢之道必畱心性命至於修齊治平之方義利取舍之分多忽而不省夫性與天道夫子罕言而四教之施必以文行忠信則其先者可知已持論甚篤實詩特其餘事然如九日和韻從肺腑中流出此等作無論字句之工不工也

王尙綱字錦夫邠縣人宏治壬戌進士授兵部主事改吏部歷員外郎中出爲山西左參政謫四

川引疾歸補陝西遷浙江右布政使有蒼谷集
蒼谷結仲默爲姻婭訂獻吉德涵子衡庭實粹夫諸君
爲衿契然其詩如入邪徑狹巷未達周行較之升堂入
室之彥尙遠馬伯循序之止許其能取友可謂善於立
言然其身後鄉里私謚曰貞孝文子則文采風流雖不
及諸君而孝行有足尙者獻吉贈詩云宏詞振宛洛一
一中音呂未免阿所好也

陳寔字聲伯德清人宏治壬戌進士刑科給事中
正德初謫判六安州歷山西提學僉事有水南

集

水南博洽著聞畱心風教詩不苟作予錄其三篇稍加
刪汰墨布袍者宋咸淳進士福建提刑德清游汝魯望
所服元初以遺老薦授福州總管固辭不就題袍背云
前宋遺民今爲百姓雖雨晴寒暑未嘗解脫卒葬果山
銀簪詞者德清女子沈回奴際元末兵亂匿蘆港中賊
獲之求合從容語曰我閨女也必擇日具禮乃可賊信
之攜至營是夜拔頭上簪刺喉死潭水清者歸安女洪
春春元至正十八年兵亂父引之避居新市賊至匿空

舍中賊入將逼之女投水死三事國史失載因具詮之
孫偉字朝望清江人宏治壬戌進士官至鶴慶知

府有鷺沙集

鷺沙詩格蒼老所惜未醇句如花邊釣艇閒依岸葉底
潛鱗不避人三日泥穿東郭履六年人住楚江城屠蘇
又醉王正月童子不嫌吾舊廬澗底山泉攜甕出籬邊
春雨課兒鉏大江水漲孤城小遠道天寒一鴈稀夜久
星河在檐宇天寒鴻鴈叫滄洲屋邊晴雨閒禽識徑裏
風泉老竹當具饒骨力

湛若水字元明增城人宏治乙丑進士改庶吉士授編修歷侍讀陞南國子祭酒禮部侍郎進尙書改兵部諡文莊有甘泉集

文以載道詩以言志不詭於道勿納於邪可也談理學者必借詩爲證道之言若禪家之拈頌說偈者然吾不得其解也司馬遷曰古詩三千餘篇孔子刪取三百五篇皆絃歌以合韶武之音則匪獨關雎鹿鳴文王清廟也凡鄭衛之詩皆合於韶武者也屈子之離騷至欲詒高辛之鳳皇畱有虞之二姚捐玦於湘君湘夫人之下

女其爲無禮甚矣然志出乎正覽者謂其爭光日月杜
子之詩篇至比母后於褒姒而顯斥其明眸皓齒目椒
房之戚爲麗人而形容及意態肌膚其亦不遜甚矣然
志出乎正論者謂其一飯不忘君是說詩者亦觀其志
之所存而已不必盡出於道德之言也元豐而後理學
風雅截然爲二大約多祖擊壤言情之作置之勿道如
傍花隨柳何害於道程伯淳恐人之議之也緊接曰時
人不識予心樂醉擁如花何害於情黃才伯恐人之議
之也亟注曰欲盡理還之喻古之所謂發乎情止乎禮

義者今之所謂發乎情必戾乎理學者也甘泉論詩推
崇定山白沙以定山爲精金千鍊謂詩法如是學者亦
必出於是吾誠不得其解也

顧應祥字惟賢長興人宏治乙丑進士累官南京
刑部尚書卒贈太子少保有崇雅堂集

尚書仕不廢學含經約史維日孜孜其在滇藩刊草廬
吳氏尚書纂言萬里遺書鄭端簡以序文商榷手蹟予
及見之端簡爲塗乙數語并疏大旨於簡端本今藏予
家集中詩不無蕪累王元美許其似白太傅亦微辭也

崔銑字子鍾安陽人宏治乙丑進士累官南京禮部右侍郎卒贈尚書有洄詞

洄詞不載詩篇其見錄於選家亦少予得公手蹟寄張子醇方伯者有上陵下陵諸作錄秋風一首存豹一斑若云與李何方駕則未見其全不敢臆定也秋風五絕云秋風何蕭蕭夜夜動林莽除畹本種蘭奈此艾蒿長

陸深字子淵上海人宏治乙丑進士改庶吉士授翰林院編修遷國子司業進祭酒謫延平府同知陞山西提學副使改浙江歷江西參政四川

布政使召爲光祿卿改太常卿兼侍讀學士陞
詹事府詹事卒贈禮部右侍郎諡文裕有儼山

集

儼山詩其原出於大歷十子平衍帖妥如設伊蒲之饌
方丈當前雖遠羶腥終鮮滋味至其折衷經史練習典
章其所紀載可資國史采擇昔朱晦翁譏葉正則知古
而不知今陳同甫知今而不知古惟許呂伯恭克兼之
儼山亦可無媿伯恭矣若夫正書似顏尚書行書似李
北海莫雲卿之論謂風力實出趙吳興之上自董尚書

盛行而儼山遂爲所掩然尚書論書法推爲正宗
世有張懷瓘估直未必定取董而遺陸也

徐縉字子容吳縣人宏治乙丑進士歷官吏部左
侍郎兼翰林侍講學士卒諡文敏有集

文敏與獻吉仲默昌穀俱深攬環結綬之好詩雖平行
較王錦夫孟望之似勝

孟洋字望之信陽人宏治乙丑進士除行人選爲
御史坐論張桂下詔獄謫桂林教授遷知汶上
縣再遷嘉興府同知陞湖廣僉事引疾歸旋起

山東僉事進參議轉陝西參政拜僉都御史巡撫寧夏改理河道終南京大理寺卿有有涯集

左孝廉舜齊獻吉外弟也孟大理望之仲默外弟也左詩近膚孟詩太淺比於郎伯邈若雲淵九日次邊太常韻云落帽憐高興銜杯意轉哀葉辭霜後樹人上雨中臺爲客悲秋盡思鄉見雁來百年幾佳節又負菊花開

殷雲霄字近夫壽張人宏治乙丑進士授靖江知

縣調青田陞南京工科給事中有瀛洲芝田二

集

近夫如傳寫手欲開生面而神采未工然風格自存終不作鋪眉苦眼求似

孫泰字時寅歸安人宏治乙丑進士官刑部郎出知成都府改兗州有龍溪藏橐

龍溪守兗日康陵南巡中涓苛索供億請以身充役時同里蔣公瑤守揚州衛民甚力扈從貴人相誠謂湖州人難犯及龍溪卒檢視篋中僅圖書數卷衣數襲而已蔣公廉節略同今兩家子姓氏微已甚信夫廉吏不可爲也

安磐字公石嘉定州人宏治乙丑進士改庶吉士授兵科給事中進都給事中議大禮被笞免官

萬歷初追贈太常少卿有頤山集

公石集句最工惜所著頤山集詩話罕傳揚用修述其論詩之旨云唐之名家自立機軸譬猶羣花各有丰韻乃或剪綵以像生或繪畫而傍影終非真也又云論詩如品花木牡丹芍藥下逮苦楝刺桐皆有天然一種風韻今之學杜者紙牡丹芍藥爾其說足以解頤

嚴嵩字惟中分宜人宏治乙丑進士改庶吉士授

編修累官禮部尙書少師武英殿大學士有鈐

山堂集

宏治乙丑殿試泰陵焚香祝天願得良輔不意是榜乃
有分宜吁可怪也然分宜通籍卽見知於獻吉仲默旋
請假還里讀書鈐山者七年獻吉遠訪之山中作鈐山
堂歌以贈於時子衡華玉廷實子鍾允寧應德輩交相
引譽又走使萬里索用修點定其詩可稱好事矣其與
友人贈答詩云自非肉食相藏拙安所宜又云故園多
所歡薄宦何爲者贈相士顏生云本無蔡澤輕肥念不

向唐生更問年一似恬澹自持無意榮利者迨爰立之
後驕縱貪黷忿懣恚淫失其本心終以致敗暮年自序
詩集云晚登政塗百責身萃回憶舊業如弁髦然觸口
縱筆率爾應酬不能求工亦不暇求工也對應德亦云
少於詩務鍛鍊組織求合古調今則率吾意而爲之耳
分宜能知暮年詩格之壞而不自知立身之敗裂有萬
倍於詩者生日詩猶云晚節冰霜恒自保昧心之言將
誰欺乎而應德翻謂不煩繩削而合若湛元明一序讀
之尤令人張目不意講學者貢諛乃若是王元美樂府

變云孔雀雖有毒不能掩文章殆平情之論乎

靜志居詩話卷九